

VONDRON'NY KANDIDÀ 11

13 mey amin'ny alatsinainy, Mahamasina sy Amparibe omaly

Nanao diabe nan-keny amin'ny Lapan'ny Fanatanjahantena sy ny Kolontsaina Mahamasina omaly, ireo vondron'ny kandidà filohampirenena miisa 11, na tsy tafiditra aza izy ireo satria nosakanan'ny mpitantandro filaminana, azo lazaina fa fahombiazana izany hetsika izany. Tsy nisy akory ny lalao handball tao amin'ity Lapan'ny Fanatanjahantena sy ny kolontsaina ity, fa fialana bala no nataon'ny tompon'andraikitra ny Tafita miandraikitra ity toerana ity. Olona marobe no nanao dia azy ireo teny antoerana. Rehefa tsy tafiditra tao Mahamasina izy ireo, niverina nihazo an'Ambohidahy sy Ambohijato, mbola tsy nisy eritreritra ny ho eny amin'ny kianjan'ny 13 mey aloha omaly io, fa raha ny fanambarana heno dia ny alatsinainy izao ny fotoana eny Analakely raha toa ka mbola avela hirotsaka ny kandidà vazaha; raha toa ka tsy hovana ny CENI; raha toa ka tsy hovaina ny governemanta misy ankehitriny izay fitondram-panjakana mitanilapa; ary raha toa ka tsy nahapetraka ny CES: Tribonaly Manokana Hisahana ny Fifidianana. Rehefa tsy tanteraka ireo dia eny amin'ny kianjan'ny 13 mey ny rehetra amin'ny alatsinainy ho avy izao. Fa ankoatra izany, « tsy mahalala menatra, olona 11 dia atahorana », hoy



Ny hetsika an-dalambe notarihan'ireo kandidà 11 teny Mahamasina omaly.

ny antsoantson'ireo olom-pirenena maro teny Analakely niantso ireo tafipanjakana nibahana ny araben'ny fahaleovantena tokony ho nanomboka tamin'ny 3 ora tolakandro omaly. Dia gaga sy soarena ny vahoaka nahita ny fihetsik'ireo tafi-panjakana nisakana ireo fiara tsy hamakivaky ny lalana nanomboka teo Andohan'Analakely mihazo eny amin'ny tsangambaton-dRalaimongo iny. Rezimanta be izao mihitsy mantsy no nampiasaina ho famoretana indray. Dia mitombina tokoa ilay teny aloha nataon'ny olom-pirenena hoe "tsy mahalala menatra", satria tena manao fihetsika manaraka baikom-bazaha marina. Kanefa, tsiahivina tamin'ny andron-dRalai-

mongo ny taona 1929, tao anaty fanjanahantany mihitsy, no namakivakian'ny vahoaka Malagasy niantsoantso "Fahaleovantena! Fahaleovantena", tsy nisy miaramilam-panjanatany, tsy nisy sonegaly nanakana azy ireo anefa tamin'izany. Izao, 63 taona niverenan'ny fahaleovantena, Miaramila malagasy manakana vahoaka malagasy maneho hevitra manohitra fa tsy mila vazaha frantsay hirotsaka hofidiana filohampirenena. Dia inona izany no ilazana hamaritana ireto mpanakana vahoaka malagasy ireto tsy haneho hevitra an-dalambe? Inona no iantsoan'ny vahoaka malagasy azy ireo hatramin'ny lehibeny mpibaiko sy mpaniraka azy? Izao sisa

no niafaran'ny firenena malagasy, rehefa olona tsy natao hitondra no mitana fahefana. Lesondratsy hatrany no aseho sy tadiavina hitoetra eto hamoretana ilay vahoaka malagasy mbola mandala aloha hatreto ny filaminana, noho ny fampahantana natao azy. Rezimanta no ampiasaina hamoretana vahoaka amin'ny resaka politika fiarovan-tseza sy tombontsoa manokana, ny asan-jiolahy sy dahalo anefa na an-drenivohitra na ambanivohitra tsy voafehy mihitsy ary tsy vita ny andraikitra nomena azy. Toy ny mahery an-tanàna fotsiny ireto eto an-drenivohitra ireto, toy ilay tsy tononina fa samy mahalala...

Sôh'son

Antso Fiarahamonina Kristiana (AFK)

Miandry fiaraha-mientana amin'ny fanatanterahana ny Vinan'Andriamanitra

Ao anaty volon'andron'ny fifidianana isika amin'izao fotoana izao. Anisan'ny andrasan'ny vahoaka amin'ireo kandidà izay mirosaka ho fidiana filohampirenena ny fanolorany vinam-piarahamonina, ho an'ny firenena hoentina mampandroso azy. Zava-dehibe ny fananan'ny mpitarika vina ho tari-dalana amin'ny fampivoarana sy fampandrosoana ny firenena. Sain'olombelona ihany no miketrika mamolavola azy ary mijery ny zavamisy eo amin'ny firenena no hamaritany azy. Mazava loatra fa rehefa sain'olombelona dia voafetra ihany satria voafetra ny fahalalan'olombelona. Ny vinan'Andriamanitra kosa anefa dia tsy izany fa tsy voafetra ny Azy. Andriamanitra dia manana ny vinany manokana hoan'ity firenena ity. Efa hatramin'ny ela no nanolorany izany hoan'ny Malagasy, izay nampitainy tamin'ny olom-boafidiny. Vina ny amin'ny lalana hisandratana'i Madagasikara, ka hiavaka amin'ny hafa. Efa hatramin'ny fotoana ela no nanolorany izany, fa isika malagasy tsy nihaino Azy, araka ny fanazavan'ny Filohan'ny Vovonana Antso Fiarahamonina Kristiana (AFK) Ricky Andriamparany. Izany indrindra no nahatonga ireo mpikambana ao anatin'ity Vovonana ity, hijoro sy handray andraikitra ho atao fitaovan'Andriamanitra ho amin'ny fanatanterahana izany Vinan'Andriamanitra izany. Efa aman-taonany maro izay, efa tany amin'ny taona 2017 tany no efa nanomboka ny asa miompna amin'izany ny AFK. Maro ny asa efa natao, toy ny fanatanana sokajin'olona tomponandraikitra samihafa na an'ny fanjakana na hatrany amin'ny fiangonana sy fikambanana



Ny filohan'ny AFK, Ricky Andriamparany.

isan-karazany. Nisy ny avy dia nandray, nisy ireo mbola nieritreritra, nisy ny nisalasala na ny nihemotra tsy tapa-kevitra. Tsy voaray ve fa Andriamanitra mihitsy no efa miditra an-tsehatra, fa tsy mijery fotsiny ny manjo ny Malagasy, hanarina ity firenena ity sy hanandratra azy. Mbola fotoana anefa izao amin'ny fandraisana fanapahan-kevitra hiara-hientana amin'ny AFK. Miandry azy ireo mandrakariva ny AFK amin'ny fitondrana anjara biriky. Efa vonona rahateo eo am-pelatanany ny fitaovana ho amin'ny fanatanterahana izany fa ny manainga no sisa. Fanatanterahana izay tsy iandra-sana sy ilàna famatsiam-bola vahiny avy any ivelany. Tsihivina mandrakariva, fa ny AFK dia tsy fiangonana ary tsy manao politika. Fifandraisana 034 17 460 53.

Aris

Ny Valosoa sy fakafaka

Andry Rajoelina

Lohalaharana tamin'ny tsy fanajàna lalampanorenana

Efa tsy eo amin'ny fitondrana intsony i Andry Rajoelina fa ny zavatra hita dia toa mbola voabaikony ireo mitondra ankehitriny. Na governemanta io na ny HCC tompon'andraikitra amin'ny fitsaràna tsy azo ivalozana. Raha ny fantatra aloha nandritra ny fitondran'ny dia marobe ireo tsy fanajàna ny lalampanorenana. Ohatra fotsiny amin'izany ny fiantsoany ny solombavambahoaka teny amin'ny Arena tamin'ny fotoana nanaovan'ny depiote fitsipaham-pitokisana ny governemanta tamin'ny fotoan'androny, izay raha ny fantatra dia depiote miisa 105 no nanao sonia tamin'izany. Vao nantsoin'i Andry Rajoelina teny amin'ny Arena foiben-toeran'ny TGV ireto farany dia nitsefotra ny fitsipaham-pitokisana saika hatao. Izany dia tsy fanajàn'i Andry Rajoelina ny lalampanorenana satria tsy azon'ny filohampirenena atao ny mamory solombavambahoaka, antaratasy ihany no azon'izy ireo ifandraisana. Teo koa ny nanendreny ny governora miisa 23, izay tsy ao anaty lalampanorenana ny momba azy ireo. Ankehitriny, efa tsy mitondra intsony i Andry Rajoelina dia mbola miseho lany ihany ny tsy fanajana lalàna tamin'ny nanendrena ny governemanta iraisana entin'i Ntsay Christian itantana ny firenena, izay mbola Rajoelina Andry no mibaiko sy tompon'izy ireo. Manamarina izany ny tsy nanomezana toerana ny kandida miisa 11 hanao tatitra amin'ny vahoaka tao amin'ny Lapan'ny Fanatanjahantena tao Mahamasina, raha afaka nanao izany ny TGV nanolotra an'i Andry Rajoelina vazaha ho kandida indray. Ny fantatra dia tsy hanaiky lembehana manoloana ny tsy fanajàna ny lalàna ny kandida miisa 11, fa hiady mba hisian'ny fanajàna lalàna eto amin'ny firenena, hisian'ny fidianana madio eken'ny rehetra. Andrasan'ny maro ny tohin'ny hetsika izay natao omaly teny Mahamasina, satria ny vahoaka koa raha ny heno teny an-toerana dia efa leo mpitondra tsy manaja lalampanorenana sy mampijaly vahoaka ary tofoka amin'ny mpitondra tranon-dainga.

Helisoa

Fifidianana

Tafajoro ny biraon'ny KMMR ao Anjeva Gara Avaradrano

Tafatsangana ny alakamisy teo, tao Andoharano, kaominina Anjeva Gara distrikan'Antananarivo Avaradrano, ny KMMR Anjeva. Nanotrona azy ireo tamin'ny fananganana izany ny solontenan'ny birao KMMR Avaradrano. Lany tao anaty fifidianana ho:

- Coordonnateur Principal na mpandrindra ankapobeny: Randriantersoa Gilbert.
- Coordonnateur Adjoint na mpandrindra lefitra: Randrianarisoa Gilbert.
- Sekretera jeneraly: Ratsimbazafy Lucien.
- Mpitambola: Randrianaivojaona Bruno.

Vonona hiasa sy hanentana ireo olona rehetra tsy ankanavaka ao amin'ity kaominina ity izy ireo, hanatevina ny fanohanana ny kandidà laharana faha-5 amin'ny biletà tokana, ny filoha Marc Ravalomanana. Fandresena no teny filamatr'izy ireo.

Niaina



Ny nananganana ny KMMR tao amin'ny kaominina Anjeva Avaradrano.